



20/09/2001

Radio Ikim.fm sedia balas fitnah

Wan Esuriyanti Wan Ahmad

KUALA LUMPUR, Rabu - Radio Ikim.fm, stesen radio milik Institut Kefahaman Islam Malaysia (Ikim), akan membalas kenyataan pembangkang yang tidak benar atau berbentuk fitnah dalam programnya.

Pengarah radio Ikim.fm, Johanni Salleh, berkata pihaknya akan memantau ceramah parti pembangkang dan membalas kenyataan yang didapati tidak benar berdasarkan fakta.

"Kami akan mengambil jalan tengah dan bersikap sederhana. Setiap kenyataan yang kami keluarkan berdasarkan fakta supaya selari dengan kehendak Islam.

"Kita akan menjawab segala tohmahan dengan cara sopan dan beradab," katanya dalam temubual yang disiarkan dalam laman web Buletin Malaysiahari ini.

Johanni berkata, pemilihan berita yang disiarkan tidak akan memihak kepada mana-mana pihak dan akan bertindak sederhana supaya tidak dilabelkan sebagai "melampau".

Katanya, kandungan berita yang disiarkan berunsur keIslaman, terutama kandungan berita nasional dan antarabangsa yang membabitkan masyarakat dan kedudukan Islam.

Bagaimanapun, katanya, kumpulan sasaran Ikim.fm bukan tertumpu kepada umat Islam semata-mata, sebaliknya bersifat sejagat.

"Ikim.fm bersifat sejagat tetapi isu berkaitan Islam akan diberikan penekanan. Secara tidak langsung, ia bertindak sebagai berdakwah," katanya yang tidak menafikan tanggapan umum saluran radio itu hanya untuk umat Islam.

"Itulah persepsi umum yang tidak boleh dipertikaikan. Bagaimanapun, Ikim.fm pada masa depan akan menyiarkan 20 peratus siarannya dalam bahasa Inggeris bagi menarik masyarakat bukan Islam mendengar siarannya," katanya.

Pada masa sama, katanya, Ikim.fm merancang bekerjasama dengan kumpulan-kumpulan Islam atau produk Islam yang lain.

Mengenai saingannya dengan radio lain, Johanni berkata, pihaknya mempunyai format berlainan dan Ikim.fm tidak mempunyai masalah mendapatkan tajaan iklan.

Radio Ikim.fm yang dilancarkan Perdana Menteri, Datuk Seri Dr Mahathir Mohamad Julai lalu, disiarkan pada gelombang, 91.5 Mhz bagi Lembah Klang; 102.7 Mhz di Perak dan Negeri Sembilan; 89.0 Mhz di Kedah, Pulau Pinang dan Perlis; 89.5 Mhz di Melaka; 107.9 Mhz di Johor Bahru; 89.8 Mhz di Kota Bharu, Kelantan; 89.6 Mhz di Kuantan, Pahang; 100.2 Mhz di Kuala Terengganu; 98.8 Mhz di Kuching, Sarawak, dan 93.9 Mhz di Kota Kinabalu, Sabah.

(END)